

STYRESAK

GÅR TIL: Styremedlemmer
FØRETAK: Helse Førde HF
DATO: 02.12.2022
SAKSHANDSAMAR: Dagrun Kyrkjebø
SAKA GJELD: **Samhandling - halvårleg rapportering**
ARKIVSAK: 2021/7463

STYRET:
Styret i Helse Førde HF

MØTEDATO:
16.12.2022

STYRESAK:
080/2022

FORSLAG TIL VEDTAK

Styret tek administrerande direktør si orientering om status samhandling til vitende.

Oppsummering

[Sogn og Fjordane helsefellesskap](#) har gjennom sitt første år etter etablering kome i gang med samhandlingsarenaene [strategisk samarbeidsutval](#) og [fagleg samarbeidsutval](#). [Partnerskapsmøtet](#) for 2022 vart avlyst og nytt møte er under planlegging for 2023.

Helseføretaket og kommunane byggjer vidare på den gode samhandlingskulturen som var i regionen vår før etablering av helsefellesskapet og møtest som likeverdige partnerar i arbeidet.

Saker helsefellesskapet har arbeidd med i 2022 er overordna strategi (sjå vedlegg), handlingsplan med konkrete tiltak (til vedtak januar -23), ferdigstilling av overordna samarbeidsavtale, revisjon av delavtalar, gjennomføring av erfaringskonferanse psykisk helse og rusarbeid på Skei og samhandlingskonferansen 2022 i Førde.

Det går også føre seg anna arbeid innanfor samhandling både internt i helseføretaket og eksternt mot enkeltkommunar. Nokre slike døme vert presentert i teksten under.

Fakta

Sogn og Fjordane helsefellesskap

Helsefellesskapet har gjennomført planlagd møteserie i år med fire møte i fagleg samarbeidsutval og fire møte i strategisk samarbeidsutval.

Partnerskapsmøtet for 2022 vart dessverre avlyst fordi mange kommunar melde frå om at den planlagde datoen ikkje passa for dei. Nytt møte er under planlegging, og dato er sett til 3. mars 2023. Det vil bli arrangert eit heildagsmøte, sidan tilbakemeldingane har vore at korte, fysiske møte ikkje er ønskjeleg.

Strategiarbeid

Det har særleg vore fokus på arbeid med strategi og handlingsplan for helsefellesskapet i 2022. Overordna strategi (sjå vedlegg) vart vedteken i strategisk samarbeidsutval 30.11.22.

Innsatsområde i strategien:

- felles planlegging
- rekruttering og kompetanse
- prioriterte pasientgrupper (barn og unge, personar med alvorlege psykiske lidingar og rusproblem, skrøpelege eldre og personar med fleire kroniske lidingar)

Andre prioriterte område:

- akuttmedisinske tenester
- digitalisering av tenester
- forskning og utviklingsarbeid

Handlingsplanen for helsefellesskapet skal vere ei konkretisering av strategien, og skisserer konkrete tiltak som skal arbeidast med i perioden 2023 – 2024. Fagleg samarbeidsutval skal handsame sak om handlingsplan i januar 2023.

Døme på tiltak som kan vere aktuelle i handlingsplanen, er oppretting av arbeidsgrupper innanfor dei prioriterte pasientgruppene, samarbeid om etablering av FACT/ACT-team, oppretting av planforum for betre felles planlegging og arbeid med ferdigstilling av avtaleporteføljene.

Avtaleutvalet

Avtaleutvalet er godt i gang med sitt arbeid. Framlegg til struktur for framtidig delavtaleportefølje er på plass, og sekretariatet arbeider no med utkast til delavtale 1 som omhandlar partnerane sine plikter i samhandlinga. Denne skal etter planen handsamast i avtaleutvalet før jul.

Delavtale smittevern, der smittevernkomitéen har oppdraget, er også i prosess. Vidar Øvrebø (stadleg leiar, Lærdal sjukehus) går inn som nytt medlem i sekretariatet og i avtaleutvalet etter Tone Holvik som har slutta i Helse Førde.

Arrangement

Samhandlingskonferansen vart arrangert 1. og 2. november med kring 170 deltakarar over to dagar. Det var gledeleg å sjå at så mange stilte opp, både frå Helse Førde og frå administrativ og politisk leiing i kommunane. Det er gjennomført ei evaluering i etterkant av konferansen med hovudsakleg gode tilbakemeldingar. Nokre ønskte seg meir rom for gruppearbeid eller workshop på konferansen, elles var dei fleste tilbakemeldingane positive når det gjaldt program og gjennomføring.

Innspel til tema for neste samhandlingskonferanse er t.d. beredskap, samskaping og samhandling, velferdsteknologi, barn og unge, rekruttering og kompetanseheving og psykisk helse.

Det har kome tydelege signal om at hausten er eit krevjande tidspunkt for eit slikt arrangement. Det er difor vedteke at neste samhandlingskonferanse vert skipa til februar/mars 2024.

Erfaringskonferanse somatikk skal arrangerast vår 2023. Arbeidet med å finne medlemmer til programkomité er i gang.

Pilotprosjekt ved Indre Sogn psykiatrisenter i samarbeid med kommunane i Indre Sogn og e-helse Vestland

Helse Førde er samarbeidsaktør i prosjektorganisasjonen e-helse Vestland. Det er no starta opp eit pilotprosjekt ved ISP: «Samkonsultasjon mellom kommunale helsetenester, ISP og pasientar med alvorlege psykiske lidingar». Prosjektleiari er Anita Foss Midlang frå Sogndal kommune/e-Helse Vestland.

Tiltaket gjeld alvorleg psykisk sjuke personar med helsetilbod/helsehjelp både frå kommunale helsetenester og ISP. Tiltaket gjeld digital samkonsultasjon mellom pasient, kommunale helsetenester/fastlege og spesialisthelsetenesta.

Totalt vil ein innan utgangen av 2022 ha starta aktivitet med samkonsultasjon og video i seks kommunar i Sogn. e-helse Vestland vil gjennom sin totale aktivitet spreie erfaringar og kunnskap i mange ulike arrangement og undervisningar, i tillegg til andre media - facebook, nettside, nyhendebrev m.v. Det er sendt ut pressemelding og Sogn Avis har laga ei sak om arbeidet: [Sogndal, Helse | Skal gje folk som slit med rus og psyke betre oppfølging: – Eg bryr meg berre om pasientane \(sognavis.no\)](https://www.sognavis.no/nyheter/2022/05/12/sogndal-helse-skal-gje-folk-som-slit-med-rus-og-psyke-betre-oppfolging-eg-bryr-meg-berre-om-pasientane)

Digital heimeoppfølging

Stryn kommune har motteke midlar til digital heimeoppfølging frå Helsedirektoratet og kontakta Helse Førde for mogleg samarbeid. Det har vore gjennomført eit internt kartleggingsarbeid rundt kva avdelingar som kan vere aktuelle for samarbeid med Stryn kommune. Pasientgruppa Stryn har valt seg ut, er behandling av sårpasientar. Kirurgisk poliklinikk, ortopedisk poliklinikk og hudavdelinga er aktuelle samarbeidspartar frå Helse Førde si side. Ortopedisk avdeling er alt i gang med å utvikle eit liknande tilbod i samarbeid med ein annan kommune. Frå avdelingane si side er det signalisert at dei er interesserte i samarbeid med Stryn. Det er planlagt workshop saman med Stryn kommune i januar, der ein skal arbeide vidare med problemstillingane.

Rekrutteringsvanskar, praksiskonsulent Sogn

Praksiskonsulentordninga (PKO) er eit nettverk av legar som har til oppgåve å forbetre pasientforløpet innan og mellom delane av helsetenesta. Hovudoppgåva er å betre samarbeidet mellom legar om diagnostikk, behandling og oppfølging. Pasientperspektiv og -behov skal ivaretakast. Helse Førde har totalt 0,7 årsverk til PKO.

PKO i Sogn sa opp stillinga i 20 prosent i august i år. Stillinga har vore utlyst i sju veker, i tillegg til at stillinga har vore promotert via PKO-leiar ut til fastlegane i Sogn og Fjordane, samt til kommuneoverlegane og elles i andre forum der PKO-leiar har møtt legar frå området. Det har fram til no ikkje lukkast å få søkarar til stillinga. Vi avventar no ytterlegare tiltak til over nyttår.

Manglande PKO-ressurs gjer at PKO har mindre kapasitet til å delta i ulike typar prosjekt- og utviklingsarbeid som er viktige for å sikre god samhandling mellom helseføretak og kommunane.

Kommentarar

Aktiviteten innanfor samhandlingsfeltet er stor og vi er no i gang med å løyse oppgåver som har blitt liggande på vent gjennom pandemien. Den utfordrande økonomiske situasjonen både i føretaket og i kommunane vi samarbeider med, vil i stor grad påverke det næraste året. Hovudfokuset for arbeidet med samhandling eksternt i tida framover vil vere å setje i verk strategi og tiltak frå handlingsplanen. På den måten håpar vi at det skal kome konkrete, synlege og målbare resultat av arbeidet i helsefellesskapet.

Internt i Helse Førde vil vi arbeide med å gjere helsefellesskapet meir kjent i eigen organisasjon, og klare å engasjere fagmiljøa i arbeidet saman med kommunane.

Saman skal vi legge til rette for samanhengande helsetenester for innbyggjarane i vårt område. Dette er utfordrande, men gjevande arbeid, og det er stor entusiasme hos partnarane for å få dette til. Mellom anna må vi i helsefellesskapet finne løysingar på korleis vi skal drive felles planlegging, som vart eit lovkrav frå august 2022.

Konklusjon

Administrerande direktør legg med dette fram halvårleg rapportering – samhandling til orientering.

Vedlegg:

1. Strategi 2023-2024, Sogn og Fjordane helsefellesskap